

Bosna i Hercegovina
Federacija Bosne i Hercegovine
Hercegovačko-neretvanski kanton
SKUPŠTINA
Broj: **02-01-XIII-149/21**
Mostar, 31.05.2021. godine

IZVOD IZ ZAPISNIKA
sa trinaeste (XIII) redovne sjednice Skupštine
Hercegovačko-neretvanskog kantona

Sjednica je održana dana 31.05.2021. godine u u sali H.D. „Herceg Stjepan Kosača“ u Mostaru sa početkom rada u 13:00 sati

Sjednicu je otvorio Šerif Špago, predsjedavajući Skupštine Hercegovačko-neretvanskog kantona.

Sekretar Skupštine, Željka Čule, obavila je prozivku.

Prisutni: Marija Bešker, Slavko Bilić, Marija Bošković, Stana Burić, Damir Džeba, Elvedin Grcić, Mejrima Hasić, Nevenko Herceg, Julineta Jurić, Vera Konjevod, Tomislav Martinović, Irma Memidžan, Ivan Odak, Andrea Pehar, Milica Pehar, Amir Šelo, Šerif Špago, Alisa Hajdarović, Minela Krpo, Nermin Vrtić, Aner Žuljević, Iva Raguz, Vesna Saradžić, Selma Drljević, Đuro Prkačin, Ismet Lulić i Slaven Raguz.

Odsutni: Ajdin Teleteović, Zora Dujmović i Edis Džino.

Konstatovano je da je na sjednici prisutno **27** poslanika, te da postoji kvorum za rad i punovažno odlučivanje.

Prisutni po pozivu: predstavnici Vlade, predstavnici međunarodnih organizacija i predstavnici sredstava javnog informisanja.

Sjednica je javna, snimana je i snimci su sastavni dio ovog Izvoda iz zapisnika.

Predsjedavajući Skupštine obavijestio je poslanike da je u materijalima dostavljen prijedlog dnevnog reda koji je utvrdio Kolegij Skupštine.

Otvorena je rasprava po prijedlogu dnevnoga reda.

Zastupnica Stana Burić predložila je dopunu dnevnog reda zaključkom koji se odnosi na nabavu seruma protuotrova protiv ugriza zmija otrovnica.

Zastupnik Ivan Odak predložio je dopunu dnevnog reda tačkom koja bi glasila Informacija o stanju u ministarstvu finansija Vlade HNK.

Usljedila je **pauza** od 5. minuta.

Nakon pauze Šerif Špago izvjestio je zastupnike da su zastupnici Stana Burić i Ivan Odak odustali od svojih prijedloga dopune dnevnog reda današnje sjednice.

Nakon konzultacija sa zastupnikom Odakom prihvaćeno je da se u dnevni red današnje sjednice uvrsti tačka: Zaključak o zaduženju Vlade HNK i ministarstva finansija da do naredne sjednice Skupštine HNK-a dostavi informaciju o problemima u sistemu obračuna plaća budžetskih korisnika u HNK-a.

Obavljeno je glasanje da se današnja tačka dnevnog reda Prijedlog Zakona o izmjenama i dopunama Zakona o dopunskim pravima boraca i članova njihovih porodica u HNK-u, raspravlja po skraćenom postupku.

Nakon glasanja jednoglasno je prihvaćeno da se Prijedlog Zakona o izmjenama i dopunama Zakona o dopunskim pravima boraca i članova njihovih porodica u HNK-u, raspravlja po skraćenom postupku.

Obavljeno je glasanje da tačka 6. bude zaključak kojim se zadužuje Vlada HNK-a i ministarstvo finansija da do naredne sjednice Skupštine HNK-a dostavi informaciju o problemima u sistemu obračuna plaća budžetskih korisnika u HNK-a.

Većinom glasova „Za“, uz 3 glasa „Protiv“ i 1 „Suzdržan“ glas, konstatovano je da je Navedeni Zaključak postao sastavni dio dnevnog reda XIII redovne sjednice Skupštine HNK.

Obavljeno je glasanje po prijedlogu Dnevnog reda XIII redovne sjednice Skupštine HNK.

Nakon glasanja konstatovano je da je jednoglasno usvojen dnevni red trinaeste (XIII) redovne sjednice Skupštine HNK.

Usvojeni Dnevni red:

- 1. Poslanička pitanja;**
- 2. Prijedlog Zakona o izmjenama i dopunama Zakona o dopunskim pravima boraca i članova njihovih porodica u Hercegovačko-neretvanskom kantonu (skraćeni postupak);**
- 3. Izvještaj o radu Tužilaštva HNK za 2020. godinu;**
- 4. Izvještaj o radu Kantonalnog suda u Mostaru za 2020. godinu;**
- 5. Izvještaj o radu Kantonalnog javnog pravobranilaštva HNK za 2020. godinu;**
- 6. Zaključak o zaduženju Vlade HNK i ministarstva finansija da do naredne sjednice Skupštine HNK-a dostavi informaciju o problemima u sistemu obračuna plaća budžetskih korisnika u HNK-a.**

Većinom glasova „Za“, uz 2 glasa „Protiv“, usvojen je i zapisnik sa 12. redovne sjednice Skupštine HNK-a.

AD 1. Poslanička pitanja

Slaven Raguž:

Sve vas najsrdačnije pozdravljam. Ja imam jednu inicijativu i jedno pitanje. Zastupnička inicijativa ide Ministarstvu unutarnjih poslova, gospodinu Slađanu Bevandi. S obzirom da je u tijeku rekonstrukcija raskrižja na vrhu Avenije, molim da se napravi sigurnosna analiza i u skladu sa kategorizacijom ceste nađe optimalan način osiguranja sigurnosti pješaka i smanjenje brzine brojnim sudionicima u prometu, prvenstveno učenicima Osnovne škole Ilije Jakovljevića, koji su svakodnevno izloženi značajnom riziku na putu do škole. Rješenje može bit ili ležeći policajac, radar za mjerenje prekoračenja brzine ili treptajući znak koji upućuje na blizinu škole i prisutnost djece. Mi smo se obratili Gradskom vijeću Grada Mostara sa sličnom inicijativom i priložio sam odgovor kojeg smo dobili iz Službe za građenje infrastrukturnih objekata, koji su se proglasili nenadležnim za to i uputili nas na Ministarstvo unutarnjih poslova HNŽ-a. O čemu se radi? Tamo se parkiraju autobusi, mislim da se ne bi smjeli parkirati, točno ispred ovoga pješačkog prijelaza, i nedavno je auto udarilo djevojčicu jednu i samo je sreća bila da nije bilo težih ozljeda i samo je sreća da tu nema nekih onaj većih nezgoda budući da je apsolutno i sa autobusima nepregledno, a i očigledno je prekoračenje i brzine kretanja i očigledno je sigurnost pješaka u pitanju.

Drugo je, zastupničko pitanje, gospodinu Adnanu Faladžiću. Zašto županija nikada nije preuzela obveze isplate plaće i doprinosa medicinskim sestrama koje su uposlene u Gradskim vrtićima Mostar? Obrazloženje. Izmjenama Okvirnog zakona o predškolskom odgoju vrtićima je nametnuto upošljavanje djelatnika medicinske struke koji nikada nije implementiran u smislu županijskog zakona o predškolskom odgoju, no nametnuti su pojedini kriteriji koji proizlaze iz državnog zakona, a u državnom zakonu je definirano da obveze isplate plaće i doprinosa medicinskim sestrama snosi županija, no u HNŽ-u je to prebačeno na osnivača. Pitanje se odnosi na razloge zašto ako je županija nametnula upošljavanje medicinskih djelatnika zašto nije preuzela i obveze troškova istih? Zahvaljujem.

Vesna Saradžić:

Zahvaljujem predsjedavajući. Pozdravljam sve prisutne. Ja imam jedno pitanje za Ministarstvo poljoprivrede, šumarstva i vodoprivrede HNK-a. S obzirom na značaj i ulogu vode koja je preduslov života i uopšte razvoja civilizacije i koja predstavlja vrijednosti nemjerljive materijalnim dobrima jer ne postoji ništa što je može zamijeniti, moje pitanje glasi: dali postoji registar izvorišta pitke vode u našem kantonu? U interesu sanitarne bezbjednosti vodovodnog sistema i veće sigurnosti korisnika smatram da je neophodno evidentirati, ispitati i staviti pod kontrolu sve moguće uzroke zagađenja, prvenstveno mislim na deponije smeća, eksploataciju kamena, gradnju hidroakumulacija, prekomjerne upotrebe gnojiva u poljoprivrednoj proizvodnji, itd., itd. Pitanje postavljam sa aspekta zaštite od zagađenja i drugih nepovoljnih uticaja na zdravstvenu sigurnost vode i izdašnost izvorišta jer je neophodno pojačati aktivnosti i nadzor nad ovom bitnom oblasti. Zahvaljujem.

Donko Jović, ministar poljoprivrede, šumarstva i vodoprivrede u Vladi HNK-a:

Jako dobra inicijativa ovo što je zastupnica Saradžić uputila, mi kao ministarstvo prije godinu dana aplicirali smo sa regijom Abruzzo baš na ovu temu, dakle potencijalni zagađivači sliva rijeke Neretve i ovih dana očekujemo konačan odgovor da vidimo jeli nam taj projekat prošao ili nije. Dakle, mi o tome mislimo, poduzeli smo određene aktivnosti, kažem sa regijom Abruzzo kandidirali skupa za taj projekat za sredstva iz EU fondova. Evo čim dobijemo odgovor, a to je projekat koji će trajat sigurno godinu, dvije dana, da se evidentiraju i percipiraju svi potencijalni zagađivači, nisu samo industrijski već i ovo o čemu ste vi govorili, otpad, itd., itd.

Iva Raguž:

Hvala predsjedatelju. Sve vas lijepo pozdravljam. Svoju današnju inicijativu upućujem Ministarstvu zdravstva, rada i socijalne skrbi HNŽ-a, a glasi: zadužuje se Ministarstvo zdravstva, rada i socijalne skrbi HNŽ-a da izda napatuk domovima zdravlja na području HNŽ-a da obave evidenciju svih osoba sa Down sindromom na svom području i da svakoj osobi sa Down sindromom pojedinačno uvedu u karton kalendar obveznih i preporučenih medicinskih kontrola. Obrazloženje. Medicinski je dokazano da kod djece i odraslih sa Down sindromom postoji veći rizik od urođenih bolesti ili kasnije pojave nekih bolesti, poput srčanih bolesti, bolesti štitnjače, problemi sa probavnim sustavom, problem sa vidom i bolesti rožnice, dijabetes, Alzheimerova bolest i leukemija. Kako bi se kao medicinske mjere prevencije blagovremeno uočile promjene i na vrijeme poduzele preventivne i potrebne mjere liječenja, potrebno je uvesti u praksu da svaka osoba sa Down sindromom ima svoj pojedinačan kalendar obveznih i preporučenih medicinskih kontrola. Smatram da bi se uvođenjem kalendara obveznih i preporučenih medicinskih kontrola na najbolji način pomoglo i roditeljima i

osobama sa Down sindromom, kako bi se prije svega blagovremeno poduzele sve medicinske mjere te na taj način doprinijelo boljoj kvaliteti, socijalizaciji i dugotrajnosti života. Hvala.

Stana Burić:

Zahvaljujem predsjedavajući. Drage kolege i ministri, sve vas lijepo pozdravljam, ovo je po drugi put. Maloprije sam izašla sa jednom inicijativom za promjenu dnevnog reda, ali sam odustala. Znači moja inicijativa se odnosi na nabavu seruma, antivipernog seruma protiv ugriza zmija otrovnica. Na terenu ove županije, kao i cijele Bosne i Hercegovine, vlada jedan nered, toga seruma nema nigdje legalno kupit, pa moj prijedlog, odnosno inicijativa glasi: zadužuje se Ministarstvo zdravstva HNŽ/K za nabavu antivipernog seruma. Nabava ovog seruma je obveza zdravstvenih ustanova, to dok je toga bilo još i u Hrvatskoj mi smo nekako to švercali preko granice, tog seruma nema nigdje legalno nabaviti. U Srbiji se isto tako ilegalno nabavlja. Zato je moja inicijativa i krenula jer na teritoriju ove županije ja ne znam dali postoji 6 komada seruma, a kreće ljeto, ugroženi su ljudski životi. Tako da ne bismo u pitanje dovodili ljudske živote predlažem da Ministarstvo zdravstva HNŽ/K pokrene, da se trajno zaduži za nabavu ovog seruma za potrebe svih zdravstvenih ustanova na području ove županije.

Ja imam još jednu inicijativu, ona se odnosi na pomoć gospodarstvenicima, odnosno gospodarskim društvima. U vrijeme pandemije COVIDA mnoga gospodarska društva se nisu snašla u ovim nekakvim svojim rokovima za ishodovanje svih potrebnih dozvola, pogotovo okolišne ili urbanističke dozvole, istekle su im, a oni su pred pokretanjem proizvodnje. Zato moja inicijativa glasi: zadužuju se nadležna ministarstva u Vladi HNŽ/K da pokrenu proceduru u roku od 30 dana za produžetak roka pravosnažnosti dokumenata koja se nalaze kod njih, a od strane investitora, a koja su se zatekla u roku od 16.03.2020. Obrazloženje. Mnogi investitori se nisu uspjeli snaći u rokovima i organizaciji posla u vrijeme pandemije, da bi im se pomoglo da završe investicije i spase radna mjesta predlažem da nadležna ministarstva vrate u rok sve dokumente koji su se zatekli kod njih 16.03.2020. godine. Naglašavam, da ovaj potez ne zahtjeva nikakva dodatna sredstva iz proračuna ove županije. Hvala lijepa.

Ismet Lulić:

Dobar dan. Pozdravljam sve prisutne. Ja imam jednu inicijativu i jedno zastupničko pitanje. I inicijativa i zastupničko pitanje su upućeni Ministarstvu zdravlja, kao i Zavodu zdravstvenog osiguranja. Pitanje glasi: zašto se osobama koje su preboljele COVID-19 naplaćuje potvrda o preboljevanju bolesti, to jeste na osnovu kojeg akta i ko je donio takav propis? U međuvremenu sam čak i saznao da to i nije u svim opštinama, evo na primjer u Opštini Ravno se ne naplaćuje, dok se u Gradu Mostaru ta potvrda naplaćuje.

Inicijativa, da se na sedmičnom nivou objave informacije o broju vakcinisanih, po starosnoj strukturi, mjestu prebivališta, te ustanovu u kojoj su vakcinisani, kao i da nam se i o dosad onim ljudima koji su vakcinisani objave informacije, koji je to broj i starosna struktura. Ovu inicijativu podnosim naravno, sad kad smo i dočekali jeli te vakcine stvorio se neki vid sumnje, barem ljudi do mene dolaze, o ljudima koji su vakcinisani, zašto neki nisu, ljudi misle da je neko preko reda vakcinisan. Tako da bi na neki način ovakvim radom sad kad bi bili transparentni kao što smo objavljivali i koliko je bilo pozitivnih, da objavimo sad koliko je vakcinisanih i da imamo uvid na nekom sedmičnom nivou. Hvala.

Marija Bešker:

Zahvaljujem predsjedavajući. Sve vas skupa pozdravljam. Moje pitanje danas ide prema Ministarstvu za pitanje branitelja HNŽ-a. Tražim od Ministarstva za pitanje branitelja HNŽ-a podatke o korisnicima sredstava isplaćenih tijekom 2020. godine po osnovu pomoći programima zapošljavanja, samozapošljavanja, stambeno zbrinjavanje, jednokratne novčane pomoći, sufinanciranje plaćanja naknade upisa u obrazovne ustanove. Ukoliko nije moguće dati puna imena korisnika, prihvatljivo je da u izvješću ili ispisu kartice zatamnite imena, ali ostavite vidljivo mjesto prebivalište korisnika. Hvala.

Aner Žuljević:

Zahvaljujem predsjedniče. Pozdravljam sve pošto se prvi put javljam. Ja imam jedno pitanje, odnosno može biti pitanje i inicijativa prema Zavodu zdravstvenog osiguranja s obzirom da sam imao određen broj upita od strane zainteresovanih osoba za odluku o biomedicinski potpomognutoj oplodnji, a nisu mogli doći do nje, da Zavod tu odluku koju je usvojio, koja se odnosi na procese koji će biti refundirani objavi na zvaničnoj web stranici Zavoda ili ako ne žele to bar da mi dostave tu odluku, kako bih je mogao dostaviti ovim zainteresovanim.

I drugo pitanje, ide isto prema Zavodu zdravstvenog osiguranja, koliko parova se po toj odluci prijavilo za refundaciju troškova, koliko njih je odobreno i koji je iznos novčanih sredstava koja su do sada odobrena i naravno koliko je parova odbijeno, a koliko zahtjeva je trenutno u obradi. Zahvaljujem.

Julineta Jurić:

Pozdravljam sve nazočne. Imam dva zastupnička pitanja za Ministarstvo rada i socijalne skrbi HNŽ-a. Koliko imamo djece sa poteškoćama u razvoju u HNŽ-u, a koliko djece su oba roditelja uposlena? I drugo pitanje, koliko je trenutno u HNŽ-u roditelja, obitelji djece blizanaca do dvije godine starosti, te roditelja s troje i više djece gdje je najmlađe dijete do dvije godine starosti?

Imam inicijativu za Ministarstvo prosvjete, znanosti, kulture i športa HNŽ-a, inicijativa pravilnik o asistentima u obrazovanju. Smatram da je potrebno žurno donijeti pravilnik o asistentima u obrazovanju za predškolski odgoj, osnovno, srednje, pa sve do visokoškolskog obrazovanja. Asistent u nastavi je osoba koja pruža neposrednu potporu učeniku tijekom odgojno-obrazovnog procesa u zadacima koji zahtijevaju komunikacijsku, senzornu i motoričku aktivnost učenika u kretanju i preuzimanju hrane i pića, u obavljanju higijenskih potreba u svakodnevnim nastavnim, izvannastavnim i izvanučioničkim aktivnostima, a sve prema izrađenome programu rada prema utvrđenim funkcionalnim sposobnostima i potrebama svakoga pojedinog učenika, te upitima učitelja, nastavnika i stručnih suradnika škole. Osiguravanje potpore pomoćniku u nastavi i stručnoga komunikacijskog posrednika predstavlja jedan od oblika razumne prilagodbe u skladu sa individualnim potrebama učenika kako bi se omogućilo njihovo sudjelovanje u odgojno-obrazovnome procesu na ravnopravnoj osnovi sa drugim učenicima i time spriječila njihova diskriminacija na osnovi invaliditeta. Načelo razumne prilagodbe podrazumijeva osiguravanje potpore pomoćniku u nastavi i stručno komunikacijskog posrednika sukladno utvrđenim individualnim potrebama, funkcionalnim

sposobnostima i postignutoj razini samostalnosti učenika s tendencijom osamostaljivanja učenika u školskoj sredini. Hvala.

Amir Šelo:

Pozdravljam cijenjeno rukovodstvo Skupštine, uvažene ministre, članove Vlade i sve kolege zastupnike i kolegice zastupnice. Imam jedno poslaničko pitanje i jednu poslaničku inicijativu za današnju sjednicu skupštine. Pitanje postavljam Vladi HNK-a, Ministarstvu poljoprivrede, šumarstva i vodoprivrede i Ministarstvu prostornog uređenja. Molim vas da mi dostavite informaciju dali je postupljeno po zaključku Skupštine HNK-a broj 02-01-017/21 od 26. januara 2021. godine, koji je objavljen u Službenim novinama HNK-a broj 1-21, kojim je naloženo Vladi HNK-a preispitivanje dodijeljenih koncesija za izgradnju minihidrocentrala Buna I i Buna II na lokalitetu Bunskih kanala jer je koncesija dodijeljena na zaštićenim dijelovima prirode, kao i ostalih koncesija za izgradnju mini hidroelektrana koje nisu realizirane u predviđenim rokovima? Mislim da će se po ovom pitanju uskoro i javno oglasiti Gradsko vijeće Grada Mostara kroz jednu odluku i jedan zaključak jer sve aktivnosti idu prema tome da će se izmijenjati i Prostorni plan Grada Mostara koji će po ovom pitanju bit usklađen sa prostorno-planskom dokumentacijom kantona i Federacije jer je ovo područje zaista zaštićeno područje i nikad nijedna se aktivnost nije smjela dešavati u tom smjeru da se na tom području dodjeljuje koncesija. Na zadnjoj sjednici Gradskog vijeća Grada Mostara se donijela odluka o pristupanju izradi plana i mislim da će se o ovim aktivnostima uskoro i veoma brzo morati zvanično deklarirati Gradsko vijeće Grada Mostara i mislim da se i gradonačelnik po ovom pitanju očitovao prema vijećnicima da on nikad neće potpisati odluku o dodjeli urbanističke saglasnosti za izgradnju minihidrocentrala.

Moja poslanička inicijativa upućena je Ministarstvu obrazovanja, nauke, kulture i sporta HNK-a i Ministarstvu zdravstva, rada i socijalne zaštite HNK-a, a tiče se toga da se Centar za djecu i omladinu sa posebnim potrebama Los Rosales reorganizuje u resursni centar Los Rosales, čime bi ovaj centar postao ustanova za inkluzivno obrazovanje i vaspitanje. Resursni centar bi služio kao podrška svim predškolskim ustanovama, osnovnim i srednjim školama kojima je potrebna pomoć u radu sa djecom s poteškoćama u razvoju.

I na kraju mala kritika svim kolegama i kolegicama. Mojim dolaskom ovdje pitaju me svi čemu služi ta bijela traka na ruci, moramo se svi podsjetiti na onaj djelić naše istorije kada su 31. maja 1992. godine vlasti Prijedora naložile svim nerspskim građanima da iznad svoje nadlaktice obavezno stave bijele trake, čime bi naglasili da eto oni nisu građani srpske nacionalnosti. Moramo da znamo da je Prijedor bio i tačka optužnice brojnim ljudima kojima je suđeno u Hagu i znamo činjenicu da je u Prijedoru stradao veliki broj Bošnjaka i Hrvata, mislim da je pobijeno preko 100 djece i mislim da o takvim stvarima trebamo više da povedemo računa. Ne tako davno takvih stvari smo imali nažalost i u Mostaru ovdje na dan 9. maja 1993. godine.

Andrea Pehar:

Lijep pozdrav svima. Ja danas imam jedno zastupničko pitanje koje upućujem Ministarstvu trgovine, turizma i zaštite okoliša naše županije. Pitanje je sljedeće. Na prošloj sjednici Skupštine održanoj 30.04.2021. godine zastupnici su jednoglasno podržali inicijativu za donošenje mjera u oblasti turizma. Mene zanima što je resorno ministarstvo učinilo po tom pitanju? Turistička sezona je tu i određene smjernice i odluke trebale su biti donešene. Podsjećam, kako je jedan od zaključaka bio da se obvezuje resorno ministarstvo i Vlada da dio sredstava preusmjeri za sufinansiranje testova za turiste pri povratku u njihove domicilne

države. Ova poticajna mjera kao što smo i naveli sigurno bi imala pozitivan učinak. Zanima me, jeli se krenulo u realizaciju spomenutog? Zahvaljujem.

Minela Krpo:

Pozdravljam sve prisutne. Ja danas imam jednu zastupničku inicijativu i dva zastupnička pitanja. Zastupnička inicijativa glasi: tražim od Vlade da prilikom raspisivanja javnog poziva za prijem pripravnika promjeni način bodovanja, tako da broj godina na birou iznosi 50% ocjene, a prosjek na fakultetu 10%, te svi ostali kriteriji da raspodjele ostatak bodova. Obrazloženje. Smatram da je u najmanju ruku nepravedno da mladi koji završe fakultet godinama budu na birou i ne mogu da završe pripravnčki rad, a samim tim nemaju nikakvu mogućnost zaposlenja, dok pojedinci odmah nakon završetka fakulteta dobiju priliku za pripravnčki. Ovom inicijativom ukoliko prihvatite doprinosimo pravednijem društvu.

Zastupničko pitanje, odnosi se na Ministarstvo unutrašnjih poslova. Tražim od Ministarstva unutrašnjih poslova HNK-a, da mi dostavi informaciju o nacionalnoj strukturi zaposlenih. Informacija treba sadržavati raspored po činovima.

Zastupničko pitanje za Ministarstvo obrazovanja, nauke, kulture i sporta. Tražim od Ministarstva obrazovanja, nauke, kulture i sporta, da mi dostavi dokumentaciju na osnovu koje je Visoka škola UNION u Mostaru dobila dozvolu za rad. Hvala.

Milica Pehar:

Hvala lijepa predsjedatelju. Pozdravljam sve nazočne. Ja imam inicijativu, upućena je Ministarstvu zdravstva, rada i socijalne skrbi. Podnosim inicijativu za zapošljavanje mladih sa poteškoćama u razvoju koji su završili srednju školu i stekli zvanje pomoćni kuhar i pomoćni slastičar, na način da im Ministarstvo zdravstva, rada i socijalne skrbi u suradnji sa Zavodom za zapošljavanje HNŽ-a osigura zapošljavanje u institucijama HNŽ-a i nekoj privatnoj instituciji, prihvaćajući financiranje njihovih plaća. Obrazloženje. Djeca sa poteškoćama u razvoju su uključena u osnovno i srednje obrazovanje, nakon čega se uglavnom završava skrb institucija o njima. Završavanjem srednje škole prestaje i njihova uključenost u društvo, ostaju na brizi samo svojim obiteljima. U programu je svih stranaka istaknuta osjetljivost i skrb o svim socijalnim kategorijama društva, posebice onima koji se nisu u stanju skrbiti sami za sebe. U prijedlogu Programa rada Vlade HNŽ-a za 2021. godinu i Programu Ministarstva zdravstva, rada i socijalne skrbi uvršteno je donošenje nacrta i prijedlog zakona o socijalnoj zaštiti, gdje se navodi, citiram: „uspostaviti sustav kvalitetnije zaštite socijalno ugroženih, isključenih i siromašnih osoba, unaprijediti postojeće socijalne usluge i uspostaviti nove preventivne servise usmjerene ka potrebama građana i voditi neophodne aktivnosti na pripremi strategije za unapređenje prava i položaja osoba sa invaliditetom“. Završen citat. Zato tražim da se zapošljavanje i financiranje mladih sa poteškoćama u razvoju uvrsti u zakon o socijalnoj zaštiti, kako bi se nastavila njihova uključenost u društvo i kako bi oni dali svoj doprinos zajednici. Samo želim napomenuti, da je riječ o vrlo malom broju mladih koji stječu zvanje pomoćni kuhar i pomoćni slastičar i nedavno sam bila na jednoj njihovoj izložbi, mislim da bismo jednom to trebali svi posjetit, ne znam jeli bilo traumatično iskustvo što sam vidjela to što sam vidjela ili sam bila sretna što su ta djeca od ničega uspjela stvoriti puno toga. Njihova uključenost je super i odlična je dok su u obrazovanju, poslije toga njih više nema. Moramo im pomoći da i oni ostanu članovi ovoga društva jer danas su oni sutra neki drugi, kažem samo njih je jako, jako malo i neće bit previše opterećen proračun HNŽ-a. Hvala.

Ivan Odak:

Pozdrav svima ponovo. Da se nadovežem na ovo od kolegice Pehar. Ja sam na jednoj od prethodnih sjednica tražio informaciju o upošljavanju osoba sa invaliditetom u HNŽ-u, s obzirom da nisam dobio tu traženu informaciju ponovo podsjećam da ste mi dužni odgovor na ovo jer prošlo je, ovo je već treća sjednica skupštine da nisam dobio tu informaciju.

Imam dva zastupnička pitanja. Prvo je, zakonom o vodama HNŽ-a definirano je vodno dobro za površinske vode II. kategorije, to jest priobalni pojas širine 5 metara od granice obale. Nadzor nad vodama II. kategorije je u nadležnosti županijske vodne inspekcije. Posljednjih godina uočene su mnogobrojne uzurpacije priobalja, a i samih korita ovdašnjih vodotoka II. kategorije, Bregave, Trebižeta, Bune, Bunice, Radobolje i ostalih. Tražim od ministra poljoprivrede, šumarstva i vodoprivrede na uvid sve predmete koje je županijska vodna inspekcija pokrenula u njegovom dosadašnjem mandatu, to jest u posljednjih 6 godina.

Također na moj nedavni upit tko ima koncesiju za vađenje šljunka iz rijeke Nerteve odgovoreno mi je da nema koncesiju nitko već da Vodoprivreda vadi šljunak i odlaže u slučaju potrebe da se koristi za obranu od poplava. Da je to istina u Čapljini bi bilo više hrpa šljunka i pijeska nego piramida u dolini Nila. Svakodnevno se pijesak prodaje i odvozi kamionima u betonare i na gradilišta, pa me zanima tko ima finansijsku korist od toga, županija, grad, odnosno općina ili privilegirana stranačka elita?

Moje drugo zastupničko pitanje. Prilikom razmatranja informacije Tužiteljstva HNŽ-a na sjednici 2019. godine postavio sam zastupničko pitanje u vezi neizvršavanja pravovremenih sudskih presuda o zabrani obavljanja djelatnosti za poduzeća Prenj d.d. Konjic, Javno poduzeće Šume Herceg-Bosne d.o.o. Mostar, Šumarstvo Srednje-Neretvansko d.d. Mostar, Šumarstvo Ljuta d.d. Konjic. Na isto pitanje do danas nisam dobio odgovor, a danas ponovo raspravljamo o radu Tužiteljstva, koje očito ignorira problematiku u vezi šumarstva i kriminala u ovoj oblasti, kao i ustavnu nadležnost ove Skupštine i njene odluke. U vezi navedenog smatram da su svojim nemarom dopustili probijanje pravnog interesa za sva naprijed navedena poduzeća te im omogućili protupravnu imovinsku korist više od desetaka milijona maraka.

Danas imamo informaciju koja je podobnija za statističko izvješće o radu Tužiteljstva te ne vidim smisla raspravljati o istom prije nego ova Skupština raspravi o stanju u oblasti šumarstva i postupanju nadležnih institucija u poštivanju vladavine prava u ovoj oblasti gdje se štiti bezakonje punih 15 godina. Ponovno postavljam isto pitanje premijeru, pravobraniteljstvu i tužiteljstvu, jesu li poduzeli sve zakonom propisane obaveze da se isto bezakonje prekine, odnosno zaštititi državna imovina od strane pravnih osoba koje ne mogu obavljati navedenu djelatnost na području HNŽ-a, posebno što je vidljivo iz informacije pravobranitelja da je ista upisana kao vlasništvo navedenih poduzeća u zemljišne knjige te se istom protuzakonito raspolože i koristi, a za ista djela niko ne odgovara? U vezi svega ponovo od rukovodstva ove skupštine tražim da se što hitnije sazove tematska sjednica skupštine jer tvrdnje kako nema zakona o šumama ne mogu opravdati bilo koga da se ovaj problem ignorira jer postoji država Bosna i Hercegovina, njen ustav i zakon, kao i njena imovina, kao i institucije koje su dužne štiti ovu imovinu. Hvala.

Stana Burić:

Ponovo vas pozdravljam drage kolege po treći put. Ali evo, sad mi pade na pamet nešto, valjda sam se ja naučila nositi sa svojom situacijom pristupa, ne pristupa, sad kolegica Marija kad sam išla niz skaline pomogla mi je da siđem niz skaline i to taj moj cijeli život, ali ovo sad što radim radim za one koji nemaju nekoga da im pomogne, za one koji se osjećaju marginalizirani jer ja sam oguglala, navikla sam čak dobijati odbijenice za posao zbog svog zdravstvenog stanja. E sad, sve javne ustanove su po konvenciji obavezne prilagoditi pristup i komunikaciju kroz svoje prostore za slabo pokretne, za invalidne osobe. Znači moje zastupničko pitanje glasi i upućujem ga svim subjektima u procesu obrazovanja na prostoru ove županije. Jesu li vaši objekti prilagođeni i dostupni invalidnim osobama, odnosno slabo pokretnim osobama? Ukoliko ste radili obnovu objekata u posljednjih 5 godina jeste li iste prilagodili za pristup invalidima? To su bili obavezni po Europskoj konvenciji, mislim da su to trebali i provesti. Hvala lijepa.

AD 2. Prijedlog Zakona o izmjenama i dopunama Zakona o dopunskim pravima boraca i članova njihovih porodica u Hercegovačko-neretvanskom kantonu (skraćeni postupak)

Obrazloženje je dao Oliver Soldo, ministar za pitanje boraca u Vladi HNK.

Otvorena je rasprava.

U raspravi su učestvovali: Elvedin Grcić ispred komisije za pitanja boraca, Slavko Bilić, Amir Šelo, Marija Bošković, Marija Bešker, Đuro Prkačin i Šerif Špago.

Elvedin Grcić ispred komisije za pitanja boraca predložio je sljedeći **amandman**:

U dijelu člana 13, odnosno budući član zakona 39a, stav 4, koji se odnosi na dio Zakona gdje je utvrđeno da će Vlada kantona polugodišnje donositi akt kojim će utvrđivati koeficijent za obračun i iznos novčane egzistencijalne naknade u skladu sa osiguranim sredstvima u budžetu za budžetsku godinu za ovu namjenu. Znamo, svjesni smo da je ovo jedan osigurač Vlade u slučaju nekih promjena u finansijskim sredstvima, ali isto tako smatramo da taj dio, odnosno ovaj stav treba brisati i da treba ostati fiksni iznos od 5 KM po mjesecu provedenom u Odbrambeno-oslobodilačkom ratu.

Ispred Kluba SDA zastupnik Elvedin Grcić predložio je sljedeći Zaključak:

„Zadužuje se resorno ministarstvo i Vlada HNK-a da nakon šestomjesečne evo primjene ovog zakona sačini jedan cjelovit izvještaj o broju korisnika prava, finansijskim sredstvima koja su utrošena za tu tekuću godinu, te sagleda mogućnost za iznalaženje dodatnih finansijskih sredstava za sljedeću budžetsku godinu, kako bi u pravo u sljedećoj godini bila uvedena dodatna godišta, a ne samo ova dva ovako kako je predviđeno“.

Ispred Komisije za jednakost tekstova konstitutivnih naroda i informiranje zastupnica Marija Bošković je predložila tehničku ispravku: „Da se u članu 7 pod a) predloženi zakon izmjeni dio jedne rečenice, odnosno sintagme.

Član 7. pod a) mijenja se i glasi: „Djeca bez oba roditelja, čiji su roditelji poginuli u Domovinskom ratu“.

Nakon zaključenja rasprave, uloženi amandmani su dostavljeni Vladi HNK kako bi se ista izjasnila.

AD 3. Izvještaj o radu Tužilaštva HNK za 2020. godinu

Obrazloženje je dala Sabina Beganović, zamjenica Glavnog kantonalnog tužioca.

Otvorena je rasprava.

U raspravi su učestvovali: Elvedin Grcić, Amir Šelo, Ismet Lulić i Ivan Odak.

Nakon rasprave konstatovano je da je Izvještaj o radu Tužilaštva HNK za 2020. godinu primljen k znanju, a konstatovano je da se na neodgovorena pitanja zatraže podgovori od Tužilaštva u pravnom obliku.

AD 4. Izvještaj o radu Kantonalnog suda u Mostaru za 2020. godinu

Budući da predlagatelj o navedenoj tački nije bilo o istoj tački dnevnog reda nije se raspravljalo.

AD 5. Izvještaj o radu Kantonalnog javnog pravobranilaštva HNK za 2020. godinu

Obrazloženje je dao Vlado Bevanda, Kantonalni javni pravobranitelj.

Otvorena je rasprava.

U raspravi su učestvovali: Amir Šelo, Šerif Špago i Vlado Bevanda, Kantonalni javni pravobranitelj.

Amir Šelo predložio je slijedeću inicijativu:

1) Skupština HNK-a traži od Pravobranilaštva BiH pravnu zaštitu prirodnih bogatstava i dobara od općeg interesa na području kantona koji su u vlasništvu države BiH.

2) Skupština HNK-a traži od Pravobranilaštva BiH da se poduzmu svi koraci u brisanju nevaljanih upisa i promjene vlasništva državnog poljoprivrednog zemljišta, šume i šumskog zemljišta i vodnih dobara i upis vlasništva u korist države BiH.“

3) Zaključak stupa na snagu danom donošenja i objavit će se u Službenim novinama HNK-a“.

Inicijativa će biti prosljeđena Kantonalnom javnom pravobranilaštvu.

Predsjedavajući Skupštine HNK Šerif Špago pročitao je prijedlog Odluke o usvajanju Izvještaja o radu Kantonalnog javnog pravobranilaštva HNK za 2020. godinu.

1) Usvaja se Izvještaj o radu Kantonalnog javnog pravobranilaštva HNK za 2020. godinu;

2) Izvještaj iz tačke 1. odluke čini sastavni dio ove odluke;

3) Odluka stupa na snagu danom donošenja i objavit će se u Službenim novinama HNK.

Obavljeno je glasanje o navedenom prijedlogu Odluke.

Nakon glasanja konstatovano je da je navedeni prijedlog Odluke o usvajanju Izvještaja o radu Kantonalnog javnog pravobranilaštva HNK za 2020. godinu, jednoglasno usvojen.

Nastavak AD 2. Prijedlog Zakona o izmjenama i dopunama Zakona o dopunskim pravima boraca i članova njihovih porodica u Hercegovačko-neretvanskom kantonu (skraćeni postupak)

Obrazloženje je vezano za amandmane dao Oliver Soldo, ministar za pitanje branitelja/boraca HNK te je izvjestio Skupštinu da je Vlada prihvatila amandmane.

Obavljeno je glasanje po Prijedlogu Zakona o izmjenama i dopunama Zakona o dopunskim pravima boraca i članova njihovih porodica u Hercegovačko-neretvanskom kantonu, *sa prihvaćenim tehničkim amandmanom na član 7, stav 1 pod a, i na član 13 gdje se briše u članu 39a stav 4, i ovo što je vezano za rok dodaje se novi član 14 vezano za produženje roka za rješavanje zahtjeva sa pet na osam dana i dosadašnji član 14 postaje član 15.*

Nakon glasanja konstatovano je da je Prijedlog Zakona o izmjenama i dopunama Zakona o dopunskim pravima boraca i članova njihovih porodica u Hercegovačko-neretvanskom kantonu sa navedenim amandmanima jednoglasno usvojen.

Zastupnik Amir Šelo predložio je slijedeću inicijativu:

„Predlaže se Ministarstvu za pitanja boraca HNK-a i Ministarstvu prostornog uređenja HNK-a da u konsultacijama sa jedinicama lokalne samouprave pripreme izmjene i dopune odgovarajućih propisa kojim bi se predvidjelo oslobađanje dijela naknade za dodijeljeno građevinsko zemljište, naknade za uređenje gradskog građevinskog zemljišta za izgradnju stambenih i poslovnih objekata, naknade za pogodnosti građevinskog zemljišta (rente) za izgradnju stambenih i poslovnih objekata i naknade za izgradnju i održavanje skloništa-zaklona licima iz člana 1 Zakona o dopunskim pravima boraca.

Inicijativa će biti upućena nadležnim ministarstvima.

Predsjedavajući Skupštine HNK Šerif Špago pročitao je prijedlog zaključka Kluba SDA, za koji je i Vlada HNK saglasna:

„Zadužuje se Ministarstvo za pitanje boraca i Vlada HNK-a da nakon 6 mjeseci primjene zakona sačini izvještaj o broju korisnika prava, finansijskim sredstvima koja su utrošena za tekuću godinu te sagleda mogućnost za iznalaženje dodatnih finansijskih sredstava za sljedeću budžetsku godinu kako bi u pravo za sljedeću godinu bili uvedeni i demobilisani borci mlađih godišta.“

„Zaključak stupa na snagu danom donošenja i objavit će se u Službenim novinama HNK-a.“

Obavljeno je glasanje o navedenom Zaključku.

Nakon glasanja konstatovano je da je navedeni Zaključak jednoglasno usvojen.

AD 6. Zaključak o zaduženju Vlade HNK i ministarstva finansija da do naredne sjednice Skupštine HNK-a dostavi informaciju o problemima u sistemu obračuna plaća budžetskih korisnika u HNK-a

Predsjedavajući Skupštine HNK Šerif Špago pročitao je slijedeći Zaključak:

„Zadužuje se Vlada HNK-a i Ministarstvo finansija da do naredne sjednice Skupštine HNK-a dostavi informaciju o problemima u sistemu obračuna plaća budžetskih korisnika u HNK-a.

Zaključak stupa na snagu danom donošenja i objavit će se u Službenim novinama HNK-a“.

Obavljeno je glasanje o navedenom Zaključku.

Većinom glasova „Za“, uz 4 „Suzdržana“ glasa usvojen je navedeni Zaključak.

Sjednica je završena u 17:30 sati.

Zapisničar
Dario Topić

Predsjedavajući
Šerif Špago